



Inatsisartunut ilaasortaq, Jens-Frederik Nielsen, Demokraatit

Royal Arctic Linep assartuinnermut akinik qaffaanera pillugu § 37 naapertorlugu apeqquteqaammut 2021-192-imut akissut

07-01-2022

Suliap normua: 2021 -
22885

ID nr., 71631159

Asasara Jens-Frederik Nielsen

Inatsisartut suleriaasianni § 37 naapertorlugu Royal Arctic Linep assartuinnermut akinik qaffaanera pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.


Postboks 909
3900 Nuuk

Tlf.: (+299) 34 50 00
E-mail: box909@nanoq.gl
www.naalakkersuisut.gl

Apeqqut 1. Naalakkersuisut pissusissamisoorsorinerlugu Royal Arctic Line piffissap sivikitsup iluani marloriarlutik assartuinnermut akinik qaffaanerat?

Akissut: Naalakkersuisut akuersinerisigut Royal Arctic Line assartuinnermi akigititamik aatsaat qaffaasinnaavoq. Assartuinnermi akigitit 2015-imi kingullermik naleqqussarneqarput. Taamaattumik uuliamut aningaasallu nalinginut tapiliut (BAF/CAF) Royal Arctic Linep qaammatikkaartumik naleqqussarsinnaasaa apeqqutigineqarsimassasoq ilimagineqarpoq.

Uuliap akiata, aningaasallu nalingata nunarsuatsinni nikerartarnerat Naalakkersuisut, Royal Arctic Linellu aqussinnaangilaat. Royal Arctic Linep uuliamut aningaasallu nalinginut tapiliutaata, niuernermi akigitit maleqqissaarpai. Royal Arctic Linep tapiliutai, Brent-ip akiata nikerarneranut sanilliullugu tulliuttumi takussutissiami (Royal Arctic Linep takussutissiaani) takussusiorneqarpoq.



Apeqquut 2. Naalakkersuisut paasissutissiisinaanerlutik, sooq Uuliamut Aningaasallu nalinginut tapiliuttagaq naleqqersuutit 2010-meersut atorlugit qaffanneqarnerisooq?

- a. Naalakkersuisut isumaqarnerlutik qaffaaneq inuussutissarsiornerup siuarsarnissaanik siunertaqarnermut tulluunnersooq?
- b. Naalakkersuisut eqqummaariffiginerlugu qaffaaneq innuttaasunut qanimut sunniuteqarnissaa?
- c. Naalakkersuisut ernummatiginerlunikku qaffaaneq Kalaallit Nunaat tamakkerlugu pisiassat nalinginnaasut akiinik pitsaanngitsumik kinguneqarnissaa?
- d. Naalakkersuisut ernummatiginerlunikku qaffaaneq Kalaallit Nunaat tamakkerlugu sanaartornerup akiinut pitsaanngitsumik kinguneqarnissaa?

Akissut: Kisitsisinik eqqarsassagaanni ukioq suna tunngavigineqarnerisooq apeqqutaanngilaq.

Apeqquutit a-mit d-mut ataatsimoortumik akineqassapput. Akigitat qaffannerinut apeqquteqartup ernumanerasuulli Naalakkersuisut ernumapput, siulianili eqqaaneqareersutut uuliap akianut, aningaasallu nalinginut Naalakkersuisut Royal Arctic Linelu sunniuteqanngillat.

Apeqquut 3. Innuttaasut inuussutissarsioritullu qaagumita Royal Arctic Line Eimskip-lu ingerlaaqatigiittalernerimut isumaqatigiissutaat pitsaasumik kinguneqartumik malugilissavaat?

Akissut: Tulliuttut ilanngullugit assartueqatigiittarneq sunniuteqarluassasooq Naalakkersuisut naatsorsuutigaat:

- Kalaallit Nunaanniit Kalaallit Nunaannullu sapaatip akunnikkaartumik ukioq kaajallallugu assartuisarneq, tamanna ukiut qulit kingulliit qiviassagaanni allannguingaatsiarneruvoq. Taamaalliluni ukioq kaajallallugu sikuneq ajortuni niuertarfiit, pisiniartarnerminni eqaallisaanissaannut annertuumik periarfissiivoq.
- Umiarsualivinnut umiarsualivinniillu arlalinnit (Aarhus, Helsingborg, Torshavn, Reykjavik) sapaatip akunnikkuutaartumik toqqaannartumik avammut tunisisarnissamik eqqussuisarnissamillu periarfissaqarneq. Sapaatip akunnikkuutaartumik assartuisoqartalerneratigut Skandinaviap, aammali Europap kiisalu USAp/Canadap assartueqatigisarnissaannut periarfissaqarnerulersitsivoq. Qanga assartueqatigiittarnerit tamangajammik Aalborgikkoortarsimanerisuunngitsooq.
- Reykjavik aqqusaarlugu Tasiilap angallavigineqalernerulerneru kiisalu Kalaallit Nunaata Kitaata Tunullu akorngisa angallavigineqalernerulernerat.
- Nioqqutissat nillataartut naatitallu Islandimeersut sivikinnerusumik assartorneqartalernerat, nioqqutissallu qangatut timmissartukkoortillugit assartorneqarpallaarunnaarnerisigut avatangiisinut mianerinninnerulluni naatitanik assartuineq.
- Nunarsuarmioqataaleriartorneq, taamaallilunilu nunarsuatsinni assartuinnermi attavittut ingerlatseqatigiiffimmik Kalaallit Nunaannillu ineriartortitsinissami aallaavigissaarneruneq. Tamanna avatangiisitigut ineriartortitsinissamut,

assartueqatigiittarnissamut, ilinniartitaanermut, inuutissarsiutinillu ineriartortitsinermut sunniuteqassaaq.

Apeqquut 4. Aalborgimi soraarsitsiortorneq eqqartorneqangaatsiartup Royal Arctic Line qanoq aningaasartuuteqarfigitigaa aammalu sulisut qassit soraarsinneqarpat?

Akissut: Assartuinissamik suliassap aaqqissuunneqartarnera kiisalu sulisoqarnermut tunngasut ingerlatseqatigiiffiup nammineerluni suliassaraa.

Apeqquut 5. Naalackersuisut atlantiku aqqutigalugu assartuussinerup kisermaassilluni ingerlajunnaarnissaa pilersaarutigaa?

- a. Taamaappat, piffissaq qanoq sivisutigisooq eqqartorneqarpat?
- b. Taamaangippat, kisitsisit suut tunngavilersuutigineqarpat?

Akissut: Royal Arctic Linep akuersissutaata atorunnaarsinneqarnissaa pilersaarutigineqanngilaq. Kalaallit Nunaannut, Kalaallit Nunaannit, Kalaallit Nunaatalu iluani imaatigut assartuinerup avammut ammanerulersinneqarnissaa, piffissami qaninnerusumi misissorluarneqarnikuunngilaq. Taamaalilluni aamma naatsorsuusiorfigineqarnikuunngilaq.

Assartuussineq pillugu isumalioqatigiissitap 2011-mi isumaliutissiissutaani (qupp. 474-475) apeqquut naatsumik sammeneqarpoq, neqerooruteqartullu ataatsimit amerlaneruppata inuiaqatigiit aningaasaqarnerinut imminut akilersinnaassanngitsutut mianersortumik nalilerneqarluni.

Apeqquut 6. Aningaasatigut allaffissornikkullu pisortanut, innuttaasunut inuussutissarsiortunullu suut kingunissaraat, killeqanngitsumik assigiittumillu unammilleqatigiinneq atlanikkut assartuussinerit ammaanneqaraluarpat?

Akissut: Naatsorsuusiorfigineqarnikuunngilaq. Imaatigut assartuineq pillugu unammilleqatigiisitsisoqassappat tamanna nalinginnaasumik akinik assigiisitsinermut, imaatigullu assartuinermit atugassarititaasunut kinguneqarsinnaassasoq naatsorsuutigineqartariaqarpoq.

Apeqquut 7. Royal Arctic Line nunarsuatta suaniit orsussamik pisiniartarpa, tassanerpiarlu pisiniartarnerup suut tunngavilersuutigai?

Akissut: Apeqquutip akinissaanut Royal Arctic Line ima paasissutissiivoq: *"Imarpikoorut Danmarkimi orsertarpoq, Kalaallit Nunaannilu pajuttaatinut nassartarluni. BAF/CAF appassisumiitinniarlugu tamanna periuserineqarpoq, uuliallu Nuummur assartorneqarneranut toqqorsivimmiinneqarneranullu umiarsuaateqarfiup akiliuteqartannginnissaanut aaqqiissutisialaalluni. Tamanna aamma patsisaalluni Tasiilamut pajuttaat Reykjavikimi orsertarpoq."*

Apeqquut 8. Royal Arctic Line maani Nunatsinni orsertarpa?

Akissut: Apeqquutip akinissaanut Royal Arctic Line ima paasissutissiivoq: *"Nunaqarfiliartaatit tamarmik angallavimmi pingaarnertut umiarsualiviini orsertarput."*

**Apeqput 9. Naalackersuisut pineqartumut attuumassutilinnik allanik
ilisimatitsissuteqarsinnaanerlutik?**

Akissut: Naamik.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga

A handwritten signature in black ink that reads "Mariane Paviasen". The script is cursive and somewhat stylized, with the first letter 'M' being particularly large and prominent.

Mariane Paviasen